

Ilay Voa Tsara Nafafy 02
Janoary 2020

2 Alakamisy janoary

Raha tsy ateraka indray ny olona, dia tsy mahazo mahita ny fanjakan'Andriamanitra. Jaona 3. 3

Fa izay rehetra nandray Azy (Jesosy) dia nomeny hery (nomeny zo) ho tonga zanak'Andriamanitra, dia izay mino ny anarany. Jaona 1. 12

Tsy maintsy hateraka indray ianao

Inona no fantatsika momba izao tontolo izao, adiny iray talohan'ny nahaterahantsika? Raha nisy olona nanazava tamin-tsika hoe tsy maintsy hifoka rivotra isika, hoe hamindra indray andro any, hoe midadasika lavitra noho ny kibon-dreny nifonosantsika izao tontolo izao, ka atao hoe ho afaka nahatakatra izany isika, dia inona no ho azontsika ninoana? Nefa dia mbola samy hafa lavitra izao tontolo misy antsika izao sy ny fanjakan'Andriamanitra, noho ny kibon-dreny nifonosantsika sy ny tontolo misy antsika ankehitriny.

Tsy maintsy nateraka isika, mba ho tonga eto amin'izao tontolo izao; dia toy izany koa, tsy maintsy hateraka indray, hateraka avy any ambony, mba ho afa-miditra ao amin'ny fanjakan'Andriamanitra. Angamba hanontany tena isika, toa an'i Nikodemosy izay nanambaran'i Jesosy ny tsy maintsy ilàna izany fahaterahana indray (na fahaterahana avy any ambony) izany, hoe : „Hataon'ny olona ahoana no hateraka rehefa lehibe?” (Jaona 3. 4). Henoy ny valintenin'i Jesosy : „Izay ateraky ny nofo dia nofo; ary izay ateraky ny Fanahy dia fanahy. Aza gaga noho ny nilazako taminao hoe : Tsy maintsy hateraka indray ianareo” (Jaona 3. 6-7). Fahaterahana ara-panahy izany fahaterahana avy any ambony nolazain'i Jesosy izany; fahaterahana avy amin'ny Tenin'Andriamanitra, avy amin'ny finoana an'i Jesosy, ary vokatry ny asan'ny Fanahy Masina ao amintsika. Koa tsy maintsy mamaky ampahatsorana sy am-panetren-tena ny Filazantsara isika. Dia io tenin'Andriamanitra raisina amin'ny fivavahana amin'i Jesosy io no hanazava ny tenantsika, ka hiteraka aina ao anatintsika : „zanak'Andriamanitra” isika.

Araka izany, ny olona tsirairay dia afaka mahita ny fanjakan'Andriamanitra sy miditra ao : io fanjakana io dia voamariky ny maha Izy Azy an'Andriamanitra, Izay fitiavana sy fahazavana, ary monina ao ny „fahamarinana sy fiadanana ary fifaliana ao amin'ny Fanahy Masina” (Romana 14. 17).